

पुर्खा दयक तकगु सम्पति. भगीगु कला व संस्कृति

पिकाक-भक्तपुर नगरपालिका



नेपाल मजदुर किसान पार्टीया नायो
भाजू नारायणमान बिजुक्छेजुं स्वप
अस्पताल निस्वाड दिला

नेपाल संवत् १९३९ शिल्लागा/२०७५ फागुन १५ / 2019 February/ ल्या:८, दाँ:१

; Dkfb slo

कासाया लिधंसाय् ख्वप याता राष्ट्रिय अन्तर्राष्ट्रिय लागाय् म्हासिइके बिय्गु कुत

ख्वप नगरपालिकां २०७५ फागुन ५ गते निसें ७ गते तक ग्वसः ग्वगु कराँते धिं धिं बला कासा क्वचाल । २०४६ सालया जनआन्दोलने सहादत जुयो द्यूपुं वीर सहिद पिनिगु लुमन्ति थ्व कराँते कासाया ग्वसः ग्वगु खः । स्थानीय तहया निर्वाचनया इलय् नेपाल मजदुर किसान पार्टीया घोषणापत्रखय् दाय्दाँसं छगू अन्तर नगर धिं धिं बला कासा याय्गु खाँ न्हिथाड तःगु खः । वहे भ्वले घोषणापत्र पाखें ब्युगु बचं पुवांकेगु ज्याभ्व मध्ये थ्व अन्तरनगर कराँते धिं धिं बला कासा नं छगू खः ।

भगीगु दे दुनेया २४ गू (नी प्यंगु) नगरपालिकां ब्वति कःगु उगु धिं धिं बला कासाय् पेसः (४००) म्हा स्वयो अप्वः कासामी तयसं ब्वती कःगु खः । भनपा वडा नं. १ लिक्क च्वंगु सहिद स्मृति खेल मैदाने जूगु उगु कासा सकलसिया ग्वाहालीं तस्कं सभ्य व भव्य काथं क्वचःगु खः । नेपाल कराँते महासंघ, भक्तपुर जिल्ला कराँते संघ, जनप्रतिनिधिपुं, कर्मचारीतः व प्रशिक्षक पिनिगु सक्रिय ग्वाहालीं उगु ज्याभ्व तस्कं बांलाक क्वचःगु खः ।

ल्यासे ल्याम्होपिन्ता कासाया लिधंसाय् स्वस्थ व अनुशासित कासामिपुं दय्केगु मतिं (उद्देश्यं) ख्वप नगरपालिकां फुकं ल्यासे ल्याम्होपिन्ता छगू नं छगू कासाखय् दुथ्याकेगु कुतः याड वयो च्वंगु खः । उकिया निंतिं वडा-वडाय् खेलकुद समिति दयक खेलकुदया ज्याभ्वःत हज्याक च्वंगु खः नपां कासाया लिधंसाय् ख्वप याता राष्ट्रिय अन्तर्राष्ट्रिय लागाय् म्हासिइके बिय्गु कुतः याड वयो च्वंगु दः ।

ख्वप नगरपालिकां राष्ट्रिय व अन्तर्राष्ट्रिय कासामी पिन्ता हाड, अन्तर विद्यालय धिं धिं बला कासा याड, वडाय् वडाय् ब्यायाम स्थल दयक ल्यासे ल्याम्होपिन्ता खःगु व भिंगु लाँपुइ यंकेगु कुतः याड च्वंगु दः ।

अन्तर नगर कराँते धिं धिं बल्ला कासा बांलाक क्वचाय्केता स्यल्लागु ग्वाहाली याड द्यूपुं सकल ग्वाहालिमिपिन्ता 'ख्वप पौ' दुनुगलनिसें भिन्तुना देछायो च्वडा नपां कासाखय् त्याक द्यूपुं सकल कासामि पिन्ता हार्दिक बधाई नं देछायो च्वडा ।

पिकाक- ख्वप नगरपालिका/सम्पादक-आशाकुमार चिकंभञ्जार/थाक्-भक्तपुर अफसेट प्रिन्टर्स

फोन ल्याः - ०१-६६१००९६, इ-मेल - bhaktapurmuni@gmail.com

‘छ्य्पिनिगु नामे बाज्याया पौ’

● हरिबहादुर श्रेष्ठ

तस्कं योपुं छ्य् भाजु अमर अले छ्य् मय्जु अमृता,
न्हिया न्हियंया लुमन्ति,

छमिगु इमेल ब्वनेधुंक जि छक ल्वल्हे जुया नपां लय्ताया अले जि छक छमिगु खाँखं गम्भीर जुया । तः दातक विदेशे चवड जीवन न्ह्याकपुं छ्य्पिनि गुकाथं जीवनया मू आजु पत्रकार जुयगु क्वःछिता । अले सम्पादक जुयगु मति तयो भिंजुय्गु महत्वाकांक्षा तयो ज्यासानेगु धृष्टता गथे याता ? जिं छमिगु मू आजुयाता हिस्याडागु मखु अले छमिगु योग्यताख्य् शंका याडागु नं मखु बरु छमिसं स्वं लायो तःगु नाइगु लाँ मखु काँभ्वः अले मुलुपाँय् डाय्गु लाँपु ल्यला धाय्गु खाँजक ब्याकेताडागु खः ।

नकतिनि नीदा-नीडादाया बैसे थ्यंपिनिगु मने गथे छम्हा नां जःम्हा प्रतिष्ठित पत्रकार नपां देशे न्हूगु पुस्ताया सम्पादक अले चवजःम्हा शिखर व्यक्तित्व जुय्गु इच्छायाता धाय्गु खाँ जक खः । छमिगु इमेलं छमिसं मार्क्स, लेनिन, जोन रिड, हो चि मिन्ह, एडगर स्नो, अन्ना लुइ स्ट्रुड व विल्फ्रेड ग्राहम बर्चेटया नां न्हिथाड तःगु खाड जिं व इमेल नेक स्वक ब्वडा । जिगु मनया नुगः खाँ (जिज्ञासा) व न्ह्यसःया लिसः न्हपालाक हे ब्यथें ताय्का । खः कार्ल मार्क्स नीप्यदा, डादाया ल्याम्हो बैसे हे दर्शनशास्त्रे विद्यावारिधि याय् धुंक जर्मनया राइन समाचारया प्रधान सम्पादक जुयो द्यूगु खः । वय्कया विद्वता, स्याचुगु भाय् व भाषाशैली व उब्लेया जनताया धात्थेंगु खाँ, मति, अथे धाय्गु इच्छा व आकांक्षायाता सर्गतय थिइगु हिलाचाथें थिक बिइगु अले द्यो डाय्क फुकसिता थाड बिइगु ज्या याइगु । अथेहे नकतिनि जक ल्याम्हो बैस हाचां गायो

स्वीदा क्यंम्हा लेनिनं गुप्त पत्रिका ‘फिलिड्गो’ (मिगुलि) पाखें जारया इलय् अमिगु शोषणया गुई मि तयो, मिथें पुगु खाँव व खाँपुखं न्हूगु समाज दय्केता पुसा ह्वलेगु ज्या यात । (मिगुली) फिलिड्गोया न्हपांगु ल्या स्वयो लयतातां लेनिनं धायो दिल – अः भ्नीके नं ज्यापु ज्यामिया क्रान्तिकारी पौ (पत्रिका) दत । श्व मिगुलिं मित्या (ज्वाला) पिल्हवइ । लेनिनया क्रान्तिकारी पत्रिकानपां तहांगु विश्वास व अपलं माया (मोह) खाने दः ।

छमिगु इमेल ब्वने धुंक छकयां जिता विश्वास हे याय् थाकुयो जिगु मन कः धाय् थाकुल । सम्हालेयायता पलख ई बित जिं मति तया – ‘अः छपुं नकतिनी जिगु लाहापातिं

ज्वंक ताचीताची याकचवडापुं छ्य्पुं मखय् धुंकल । अथे धायां छपुं नकतिनिया ल्याम्हो व मचाल्यासे नं मखुत । छपुं अः जिम्मेवार नागरिक जुय धुंकल । छपुं अः न्ह्याब्लेनं जुइगु चुनावे भोत बिय दःपुं, उम्मेदवार जुय फःपुं मनू जुय धुंकल । अः छमिगु मति, इच्छा, आकांक्षा व जीवनया मू आजुखय् पंगः थानेगु ज्या

जिं याय् फैमखु । अथेयात धःसा जि तस्कं ज्यालगे मज्म्हा ई मथूम्हा मनू जुइ । जिं यां छमिता दुनुगलं निसे क्वतुगु सल्लाह बिय अले छमिगु मतितयागु आजु पू वानेमः धाय्गु कामना याय् ।

छमिगु इमेले जोन रिडया नां न्हिथाड रूसी अक्टोबर क्रान्तिं ‘संसारता भ्वखाब्वय्क ब्यूगु व हिन्हुया दिं’ (संसारलाई हल्लाउने दस दिन) याता लुमांक बिल । धात्थें हे व साफू खं पश्चिमी संसारता आतांहाँ चवंक बिल । क्वत्य्क चवपुं मनूतय्गु ख्यूगु मनय् आशाया तुइजला



त्वक बिल । हाकुगु सुपाँय् चिडक ह्योँम्हा सुद्योँ लुडक बिल । धात्थें छमिसं एड्गर स्नोया नां न्हिथाड संसारता चिनया 'आकासे ह्याउँगु (नौ) नगु' नपां म्हासिडके ब्युगु थें ताय्का ।

जि तस्कं योपुं छ्य् अमर व अमृता,

जिं गुब्ले मति मतयागु खाँया उपहारनपां तस्कं बाँलागु लिचव नं बियो हःगुलिं जि साप हे लय्ताया । छमिसं क्वपुलां पहःया परम्परागत, धेबाया निंतिं याड्गु व्यवसायिक वा म्हाय्पुसेच्वंगु पत्रकारिताया थसं क्वत्यल तःथाय् न्हूगु जोश, उत्साहया लाँपु चाय्केगु मू आजु तल । जनतातय्ता थानेगु मति तल । निजी कम्पनी व सूचना मन्त्रालयया आशिर्वाद व आदेशे म्वाड च्वंपुं सम्पादकत, समाजय् न्हूगु उपद्र जुयो थःगु जाभु लाक काड दक ग्याड लाहा खाक च्वयो च्वंगु प्रशस्तिया विरुद्धय् मिबवाला थाड क्वपुलांगु समाजयाता उड (दावानल) सम्पादकीय च्वय्गु मतितल । गुकिं अमेरिकाया अणु बमं हिरोसिमा व नागासाकी धू धू याड अमेरिकी साम्राज्यवादं संसारता किमिसिक्क ख्याड च्वंगु इलय् क्रान्तिया नायक क. माओ त्से तुड्गके संसारता मुक्ति बियगु उपाय छु दःधाय्गु प्रसङ्गे अन्ना लुई स्ट्रङ्गं न्यडद्यूगुया लिसः ले 'साम्राज्यवादथें अणु बम नं भवँते च्वयो तःम्हा धुं थें जक खः । बुँख्याचा जक खः । स्वयबले ग्यापुसे च्वसां अमिता भीसं बुके फः । छन्हु भी त्याड । ल्वापुया त्या बु छगू नेगू ल्वाभः (हतियार) खं क्वछिड्गु मखु । उकिया (निर्णय) निपं अजेय जनतां याड ।' धाय्गु खाँखं संसारया शोषित पीडित जनताया नुगलय हिक्वात अले अःपुक साँस ल्हात । संसारया फुकक शोषित पीडित जनतातय्सं शान्तजुयो याउँक उत्साहया सास ल्हाय्गु थाय् दय्क बिल । धात्थें भीगु देशे अजपुं पत्रकार व सम्पादकत वैतिनि धाय्गु कल्पना याय् फैला ? म्हागस खाने फैला ? गुम्हासीं विदेशी धेबा, म्यानपावर कम्पनी व विदेशी सामानया विज्ञापनं पत्रिका न्ह्याक च्वनिगु धाय्गु स्वयो विदेशी तय्गु च्यो जुयो अमिगु प्रचारया ज्याभः जुयो च्वनि । अझ हिरोसिमा व नागासाकी दकले न्हापां भःम्हा पश्चिमेली

बिल्फ्रेड ग्राहम बर्चेत गुम्हासीं अणु बमं यागु ध्वंसात्मक ज्या याता न्हूगु 'प्लेग' धायो ध्वाथुडक ब्यूम्हासिता, अमेरिकन तय्सं 'स्तालिन याय्म्हा एजेन्ट' धाय्गु मुखतापूर्ण प्रचार याता । हिन्द चीनया बारे संसारता ध्वाथुडक ब्यूम्हा बर्चेत धात्थेंम्हा साहसी पत्रकार खः । साइकल गयो अले साइकल पाछायो पहाड पर्वत व तः त जःगु खुसी छिड भियतनाम, लावस व कम्बोडियाया (जंगल) गुं गुं त्यालाँ छिड वाड 'मेकोड उढेको' व आनाया जनताया मुक्तिया निंतिं ल्वाड च्वंगु साहसया खाँ, विश्वास जनताया हःने ब्वयो द्यूम्हा वहे बर्चेत हे खः ।

जियोम्हा छ्य्पुं,

जिं भीगु दे नेपः या छुं छुं पत्रकार व सम्पादक पिनिगु जक नां कानेताडा । चिटिक्क बाँलागु प्यपाना जकया 'समाज' छगू इलय् मदिकक पिथाड तःगु पत्रिका खः । उगू पौ (पत्रिका) खय् थःगु धापुयाता सम्पादकीय खय् ब्वयो दीम्हा भाजु खः मणिराज उपाध्याय । पूर्व प्रम टंक प्रसाद आचार्य नपां क्वात्तुगु स्वापु दःम्हा सम्पादक, नेपाल चीन (सम्बन्ध) स्वापुया वय्क स्यल्लाम्हा सम्पादक नं खः । वय्कया च्वसा थजगु लागाय् तस्कं ज्वः । कोसी व गण्डकया भारतनपां यागु सम्भौताया विरुद्धय् खाँवलं जक मखु सम्पादकीय हे हाकुक पाड छगू काथंया प्रतिकात्मक विरोध याड द्यूम्हा साहसिक व्यक्तित्व खः वयक उपाध्याय जु । छुं ई न्हयोँ वयक मन्त अथे नं देशभक्त पिनिगु मनय् वय्क सदां म्वाड च्वंगु दः ।

अथेहे स्याचुगु भाय् छ्यलेसःम्हा कुंदांक न्वचु बिडम्हा स्पष्ट वक्ता नपां नुगलय् थुंदिक् आलोचनायाड नुवाय्गु अभिव्यक्ति स्वतन्त्रताया ध्वाय्ंयाता (भण्डा याता) न्ह्याबले च्वय्थयंक ल्हानिम्हा 'मातृभूमि' वापौ या सम्पादक गोविन्द 'बियोगी' नं यक्वसिया नुगलय् म्वाड च्वंम्हा छम्हा व्यक्तित्व खः ।

भाय् व ज्ञानया धुकु अले लोकं ह्वाम्हा 'समीक्षा' या सम्पादक मदनमणि दीक्षित थौतक नं च्वसाया लिधंसाय् दड च्वंम्हा व्यक्तित्वकाथं अपसिनं नां कायो च्वंगु दः । पुलांगु रञ्जना सिनेमा हलया पःखपिने दक्षिण पश्चिम

पाखेया कुंचायनं 'समीक्षा' पिथांगु खाँ पुलांपु ब्वनामि (पाठक) पिंके अः तकनं लुमाडवनि जुई । व लुमाकिंगु स्वाभाविक नं खः ।

मदनमणि दिक्षितजुया राजनीतिक लाँपु नागबेली कःसां वय्कया स्यल्लागु चवसुखं अपलं अपः पाठकतय् नुगः क्वसः । पत्रकारिता व साहित्यख्यले वय्क लुमांके बहम्हा पात्र खः ।

चिच्याहांगु अले यक्व पाना दःगु, लिपाया पानाय् छम्हा बाँलाम्हा मिसा सुन्दरीया किपाः नपां बयान, थी थी न्ह्यसः लिसः व वामपन्थी ज्याभ्क्वः या विरोधी 'नयाँ सन्देश' अः ख्वं थियो च्वंगु दः । सम्पादक खः रमेशनाथ पाण्डे, वय्क हे नेपःया कुटनीतिक स्वापु मरुगु दे ताइवाने अमेरिकाया ग्वाहालीख्य वांम्हा न्हापांम्हा मनू खः ।

अथेहे 'कमनर' व 'मदरल्याण्ड' या श्रेष्ठ सम्पादक भाजुपुं, लिपा अञ्चलाधिश जूम्हा 'नयाँ समाज' या सम्पादक पशुपति पाण्डे व मेमेपुं छगू नं छगू शक्तिकेन्द्र पाखें प्याखं ल्हुइक तःपुं पत्रकार व सम्पादकत छगू इलय् प्याहाँ वल अले पुखुली नागुलि थें तान ।

छगू इलय् भीगु नेपः देशे गुळें गुळें छन्हू आँतं 'न्यूयोर्क टाइम्स' यें थ्यनिगु अले अःतक जलाखाला दे पाकिस्तानया 'डन' वा मेमेगु अजगू पत्रिकात बजारे खाने मदय् धुंकल । अमेरिकाया 'न्यूज विक' व 'टाइम' वा पौ अमिगु शान्ति सेनाया हुनिं मःगु स्वयो अप्वः प्रचारे वगु खः । अले 'सोभियत भूमि' नेपाली जनताया छँ छँ अले 'सोभियत न्यूज एण्ड भ्युज' बुद्धिजीवी तय्थाय् म्हवजक हे थ्यनिगु । भारतया 'स्टेटम्यान', 'टाइम्स अफ इन्डिया', 'नवभारत टाइम्स', 'हिन्दुस्तान', धर्मयुग, 'दिनमान' व मेमेगु अजगु पत्रिकात येंया गल्ली गल्ली थेनिगु । नक्सलवादी आन्दोलनया छगू छगू घटनायाबारे चवइगु कलकत्तां पिथानिगु 'नेशनल स्ट्यान्डर्ड' अर्थतन्त्र व सिंहदरवार मिन्वबले उकिया लां लां खबर ब्यूगु 'अमृत बजार' पौ सायद पिथाने मफःगु तःदाहे दय् धुंकल । बम्बइनं पिथानिगु 'इकोनोमिक्स टाइम्स' व छगू स्तरीय पत्रिका 'द करेन्ट' नं अः येंया बजारे खानेमरु । छगूताकाय्

'द करेन्ट' पत्रिकां जापानविरोधी लडाईया इलय् छम्हा वरिष्ठ पत्रकार जुयाता नेहरूजुं चीने छ्वबलेया छसिकाथं धाराबाहिक रिपोर्ट छापेयाबले भारत व चीन जलाखाला दे जूसां सञ्चार छ्यलेगु ज्या अःपु मजुगु खाँ च्वयो दिल ।

१२/१३ साल पाखे हुलाकं विद्यार्थी कार्यालयया नितिं 'सचित्र चीन', 'आजको चीन', 'चाइना रिक्स्ट्रक्सन', 'इभर ग्रीन', 'बेइजिङ रिभ्यु' मस्को न्यूज नांया थी थी पत्रिकात छ्वयो हैगु । यें चिनियाँ दूतावास चाय्कानिं 'सिन्हवा न्यूज' नं ह्यगु यात ।

छ्यभाजु अमर व छ्य मय्जु अमृता,

इमेलं छमिसं हो चि मिन्हया खाँ नं चवतः जिता तस्कं लय् वल । थःगु मातृभूमिया मुक्तिया नितिं वय्क अफ्रिकी देशे भायो फ्रान्सेली अत्याचारया खाँ च्वयो संसारता थुइकेगु तस्कं बांलागु ज्या साड द्यूगु खः । उकिं च्वय् न्हिथाडा काथं पत्रकारिता तस्कं च्वछाय् बहगु पेशा खः दक धाय्फः । अले तस्कं थाकुगु जक मखु पानीजहाज न्हयाक्वहे तःग्वगु अले तःब्यागु थजु कम्पास मरुगु जहाज ख्यंगु चान्हय् महासागरय् लाँबिड तानिगु सम्भावना अपलं दै । अथेहे राजनैतिक कम्पास दःगु पत्रिकां मथां हे भीगु आजुइ थ्यंकी । उकिं पत्रकार व सम्पादक भाजुपुं तस्कं जिम्मेवार मनू खः धाय्गु थुइके मः ।

अः अथे खानेमरु । थ्व अफसोच खः कि धेबा मकाय्क समाचार मच्वैपुं, चच्छी तक अय्ला मत्वंकसा (बुखाँ) समाचार मछ्वैपुं, गुम्हासितां मखुसां, मखुगु खाँ च्वयो बद्नाम याइपुं, गुम्हास्यां मखुगु प्रशंसा याड छाय् पिइपुं पत्रकार व सम्पादकत भीगु देशे दुनेया जिल्लाय् जिल्लाय् यक्व हे दः । अले अजपुं पत्रकारत छमिगु आस्थां भय्ब्यूगु पत्रकारिताया हःने बताचाया मतापवा नः वैपुं की थें मिं न्वयो सी । धेबाख्य् सीपुं भ्रष्ट पत्रकारत छमिगु हःने मिंनयो हैग्वः जुइ । छन्हू भीगु देशे नं अन्तर्राष्ट्रिय स्तरया पत्रकारपुं व सम्पादकपुं ब्वलानि । नेपःया प्राज्ञिक कुलौम्य ह्यो लिभः थें त्वइगु पक्का हे खः ।

तस्कं योम्हा छ्य् मय्जु अमृता व छ्य् भाजु
अमर,

थःगु इमेले थः ब्वाया नुगः मछिंकगु व मिखाले
ख्वबिं जाय्कगु खाँ सायद छं अजि पाखे खाँ सिइकगु
जुयमः -

छमिसं खाँ थुइकति

म्वाम्हा मन् व खः

गुम्हासिनं अनुभव याइ

सुख व दुःखया परिवेशे

म्वाम्हा मन् वहे खः

गुम्हेस्यां ईया दुकदुकीता

थःगु हे नुगःया दुकदुकी ताय्क

मन् व जनताया न्हिलासुनपां

थःनं खितिखिति न्हेली

अले, जनताया दुःख खे

थःगु दुःख भाःपा

जनता नपां ख्वइ दुःखखेतम्बइ जनतानपां

जनताया दुःख खाड तं वइबले... ॥

जि तस्कं योपुं छ्यपुं

खःजि ख्वय् मनं ख्वय्, मिखालं ख्वय् अले छपुं
नपां धःसा न्हयेले न्हयेल ख्यो याय् ।

संसारे न्हास्वयंयो दुःख म्हवःजुयो वानि । अले
सुख मालेगुलि दुःख सिइ, लोभी, पापी व स्वार्थी तय्गु
कुविचः व मभिङ्गु मतिया विरुद्धय् अझ ता ई तक ल्वाय्
मालितिनि । अले विजय धःसा सर्ग थें चकाड, चखेड
वानि, अनन्त अनन्त तक ।

लिबात, थौयाता थुलि हे धायो बाय्, शुभाय् ।

छमिता तस्कं माया याइम्हा
बाज्या

ख्वप नगरपालिकायागु



रेडियो ज्याभ्व
'ख्वप सः'



भक्तपुर एफ.एफ. १०५.४ मेगाहर्जखय् न्याडदिसं
बुधबार : सुथाय् ७.३० इलय् लिसिं ८.३० ता इलय् तक
शुक्रबार : बहनी ६.३० ता इलय् लिसिं ७.३० ता इलय् तक

ख्वप नगरपालिका

नगर कार्यपालिकायागु कार्यालय
ब्यासी, स्वप

ख्वप नगरपालिकां अडियो नोटिस सेवा हचिकगुलिं
नगरपालिकायागु सूचं व ज्या भ्वः क्वय् च्वयतःगु नम्बरखय्
डायल यड न्यने फौगु खाँ दकोसिता ब्याक चोडा ।

Audio Notice Number : १६१८०१६६१००९६

स्वप नगरपालिकाता न्ह्याबले

सफा, सुगुधर तय्गु सकल

नगरवासीतय्गु कर्तव्य खः ।

ख्वप नगरपालिका नगरवासीतय्गु थगु हे संस्था खः

करदातातय्सं इल्यहे कर पुलदिसं

नगरयागु विकासयाता ग्वाहाली यड दिसं

‘निजीकरणया पक्ष काइपुं वा लिइपुं कम्पुनिष्ट जुयफैमखु’

● नेमकिपा केन्द्रीय सदस्य सुनिल प्रजापति

नेपाल मजदुर किसान पार्टीया आजु जनताया प्रजातन्त्र, समाजवाद जुयो देशे साम्यवादी समाज निस्वानेगु खः । समाजवादया अर्थ उत्पादनया फुक्क साधनत सामाजिकीकरण, व्यक्तित्व विकासे फुक्कसिता उथिग्यंक अवसर, शिक्षा व स्वास्थ्य उपचारे निःशुल्क याइगु व्यवस्था खः । नेमकिपा अः जनतातय्ता बैचारिकरूपं सचेत व संगठित यायता समाजवादी गणतन्त्र प्रचार अभियान यासैं हःचिल च्वंगु दः ।

अः भीगु देशं संघीय संसद व प्रदेश सभाखय् नेपाल कम्पुनिष्ट पार्टीया अप्वः मनूत दः । अमिगु बहुमत दः । संघीय संसदे नेकपाया दुई तिहाइ दःसा ७ गू प्रदेशमध्ये २ नं. प्रदेश बाहेक नेकपाया हे एकलौटी सरकार दः । कम्पुनिष्ट पार्टीया नामं निर्वाचन ल्वाड त्याकवम्हा सरकारं कम्पुनिष्ट चरित्र क्यने मफः । छुनं पार्टी कम्पुनिष्ट पार्टी खःला कि मखु धाय्गु सिइकेता अमिसं निजीकरण वा राष्ट्रियकरणमध्ये गुगु लाँपु (नीति) काला उकिता आधार काय्म । निजीकरणया पा लिइपुं कम्पुनिष्ट जुय फैमखु । नेपाले २०४६ साले पञ्चायती

व्यवस्थाया अन्त्य जुसां पञ्चायती संस्कार अन्त्य मजु । म्हेग पञ्चायतं छु याता नेकानं अथे हे याता अले वहे लाँपुई एमालेनं वाना । उकिं भीसं वाता किजाम्हा कांग्रेस (भाई काँग्रेस) धाया । माओवादीनं तःक हे सरकारे वान । अपुनं एमालेया पलाख्वाँय लिइ वाना । अःनेकपाया सरकार खः । वहे पहः, छतिहे ह्युगु खाने मरु । नेका, एमाले व माओवादी नाँजक पापुं निजीकरणया पालिइपुं पूँजीवादी पार्टी हे खः । थुकी सुनं शंकायाय्म्व अपुं छगुहे दैया लै खः । छगुंतुं स्वभावयाय् पार्टी खः ।

नेमकिपां पूँजीवादी पार्टीया विरुद्धे मदिसैं सैद्धान्तिक संघर्ष न्हयाक वयो च्वंगु दः । नेपाले एनजिओ व आइ एनजिओ खानेदय्क खुलेआम ज्यासाड वयो च्वंगु दः । छुं नं. एनजिओ, आइएनजिओ तय्सं भीगु देशय् धेबा खर्च याइ मखु । अमिसं थःथगु राजनैतिक स्वार्थ ज्वड वइ, नीति निर्मातातय्ता थःगु प्रभावे लाकी । एमाले व माओवादीया अपलं नेता त एनजिओ, आइएनजिओया सञ्चालकत खः ।



अजपुं मनूत हे अ साँसद मन्त्री, प्रदेश अले स्थानीयतहखे मुख्य मुख्य पदे च्वङ्गु दः । विदेशी तय्गु धेबाखय् म्वाङ्गु च्वंपुं मनूतयसं कतया स्वार्थया निंतिं हे ज्या सानि । विदेशी तय्गु स्वार्थया निंतिं हे ज्या सानि । विदेशी तय्गु स्वार्थया निंतिं ज्या सानिपुं विदेशी दलाल खः । राजनैतिक नेता तयसं विदेशी तय्गु निंतिं ज्या सांतले जनतां सुख सिङ्गु मखु । देश हज्याङ्गु मखु ।

२०४६ साल निसें अःतक सरकारी स्वामित्वखय् छ्णू स्कूल, कलेज व विश्वविद्यालय दय्कगु मरुनि । गुलिनं शैक्षिक संस्थात चाय्कला व निजी क्षेत्रं चाय्कगु खः। सरकारं थःगु लगानी खय् छुनं कलकारखानात नं. चाय्कगु मरु । पञ्चायतकालय् थीथी देशं नेपाली जनताया आर्थिक विकासया निंतिं दय्कब्यगु कलकारखाना छ्णू छ्णू यायां पत्रु भवं निजीकरण याङ्गु देशयाता कङ्गाल याङ्गु आर्थिक रुपं टाटपल्टेयाय्गु स्थिति थ्यंक बिला ।

अःभिके यक्व निर्यातयोग्य बस्तुत मरु । न कृषि न औद्योगिक उत्पादन हे भिके दः । भिसं फुक्क धाय्थें बस्तु विदेशं (आयात) न्याङ्गु ह्यगु । कृषिप्रधान धःगु देशे जाकीजक लच्छीया २ अर्ब दां स्वयो अप्व दाँया न्याय धुंकल । ह्यगु श्वडालाया दुने नेपालं करिब ६ खर्ब दाँया विदेशं आयात यात धःसा ३७ अर्बयाजक (निर्यात) पिने छ्वय्फता । थुगु ई दुने ५ खर्ब ६३ अर्ब ब्यापार घाटा जुल । डाला हुने जाकी १० अर्बया (आयात) न्यात । ऋणं क्वत्येक च्वंम्हा देशं विकास हज्याके फैमखु । संसारया इतिहासता स्वय्गु खःसा ऋणं क्वत्येतले देश थाहाँ वयफःगु मरु ।

भीगु देशया ल्यासेल्याम्होत न्हिं १२/१३ सय रोजगारी मामां विदेश वङ्गु च्वंगु दः । अपः धाय्थें अपुं खाडीमूलक व मलेसिया वानिगु खः । आना अमिसं तहांगु दुःख सियो च्वंगु दः । तर भीगु देशे बुँ बाँभ, ज्यासानिपुं मनूत लुङ्गे थाक् । अपलं गाँल्यासे ल्याम्हो मरुगु गाँजुयो च्वंगु दः । सी थाय् सल्लाँ वानिपुं मिजंत मरुगु यक्व समाचारत भिसं न्यङ्गु च्वङ्गु । भीगु देशया पहाडे थाय् अनुसारया सिसाफल (फलफुल) पिङ्गु न्ह्युकाथं आधुनिक कृषिया विकास याय फत धःसा खाद्यान्न व फलफूले आत्मनिर्भर जक मखु उगु बस्तुत विदेशे निर्यात याङ्गु अरबौ धेबा कमेयाय् फः । धात्थेगु खाँ नीति निर्माण

खः । राजनीतिं हे फुक्क खाँ क्वछिई । अकिं हे राजनीतिता फुक्क नीतिया (राजा) जुजु धाइ । राजनीति बाँलासाहे राजनीति याङ्गु गतिमलात धःसा जनतां दुःख सिङ्गु । देश व जनताया सेवा याय्गु भावना दःपुं मनूत देशया च्वयच्वयया पदे थ्येगु जूसा देश यक्व हज्याय धुकल ज्वी । भीगु देशे २००७ साले राजनैतिक परिवर्तन जूगु खः । चीने उगू हे इलय जनवादी क्रान्ति सफल जूगु खः । चीने अ १ अर्ब ३५ करोड जनसंख्या दः । चीन नेदा लिपा अथे धाय्गु चिनियाँ कम्युनिष्ट पार्टी निस्वांगु सच्छिदा क्यंगुया लसताय् सन २०२१ तक खय् संसारे दकले अप्वगु अर्थतन्त्र दःगु देश दय्केगु आजु तातुङ्गु हज्याङ्गु च्वंगु दः । थुकिया मू हुनि भीगु देशे राजनीति सानिपुं अपलं मनूत सेवा स्वयो ब्यापारी सोच अप्वः तयो ज्यासांगुलि थथेजूगु खः ।

जनआन्दोलनया लिधंसाय् भिसं प्रजातन्त्र पुनस्थापना नपां गणतन्त्र स्थापना याङ्गु । सत्तावनिपुं पार्टीतय् निम्ति गणतन्त्र माकया लाहातय् नैक्यथें जुल । सत्ताय् वापिसं थःथिति अले थःकाय् म्हाय्पिन्ता जक स्वता । बाँलाम्हा व योग्यम्हा मनूजसां पार्टी याय्गु भण्डा मज्वंसें छुं हे पदे च्वने फैगु स्थिति हे मत । फुक्क खाँज्या भागवण्डाखय् सिधय्कसिलिं भीगु दे व भि गना थ्यनि?

थःयाय्गु राजनीतिथें जक जुङ्गु खःसा हिदालिपा भीगु देशया राजनीति गुण्डा, तस्कर, बलात्कारी व अपराधी तय्गु लाहातय् वानिगु पक्का खः । अःथुकिया लक्षण खानेदयो वयो च्वंगु दः । अपराधी धायो पुलिसं मालच्वंपुं मनूत साँसद जुयो च्वंगु दः । हत्याया आरोप लाङ्गु च्वंम्हा मनूयाता जेलं पिताहयो सांसदया सपथ काय्क हकनं जेले तुं तय्यंकगु दः । थःजगु ज्याइवखं कन्हे गजगु नजिर दय्कि ? गम्भीरजुयो स्वय मःगु दः ।

भीगु देशया राजनीति ठेकेदारया लाहातय् लाङ्गु च्वंगु दः । सांसद त्याकेता करोडौ ध्यबा हवलागु खाँ सांसदया म्हुतुं हे कांगु दः । सांसद त्याकेधुंक अमिसं थःगु खर्चजगु धेबाजक सय्किगु मखु बरु ब्याज अले ब्याजया ब्याजनं साय्कि । राजनीति ब्यापारी मानसिकता दःपुं मनूतय्गु लाहातय् लातकिं अमिसं लब बाहेक मेगु छुंहे खानी मखु । देश गालय् क्वफ्वायगुलि नेताजक मखु जनतातनं दोषी खः । भ्रष्टाचारी,

तस्करि बेइमान धाय्गु सिइकं सिइकं भीसं अमिता भोट बियो त्याका ।

अःयाय्गु राजनैतिक व्यवस्था पश्चिमेली प्रजातन्त्र खः । नेपःया शासकदलत संसदीय मूल्य मान्यता काथं नं. न्ह्याय् फःगु मरु । संसदीय व्यवस्थाय् प्रमुख प्रतिपक्षदलं सत्ताधारी दलया कमी कमजोरी क्यड सत्तां क्वफ्वायता स्वई । अले सरकार असफल जूसा प्रतिपक्ष दलं सरकार दय्की । प्रतिपक्ष कमजोर जुलकिं प्रजातन्त्र कमजोर जुई । थुगु इलय नेपाली काँग्रेस थःगु हे पार्टी दुनेया कलहं कमजोर जुयो च्वंगु दः । नेकां संसदे प्रमुख प्रतिपक्षया भूमिका म्हेते फयोच्वंगु मरु ।

सरकारं समृद्ध नेपः सुखी नेपालीया नारा जक थवयक देशया समृद्धिया ज्या छुं हे याय् फगु मखु । स्वनिगः याता धू मब्बइगु सफा शहर द्युकेगु खाँ जक लहाता अले ज्या छुं हे जूगु मरु । अःनं स्वनिगःले व वलकिं ध्याच अले लिभः त्वतकिं धू ब्वइगु बढे जुय बाहेकं म्हव मजु । सिन्डिकेट मद्यकेगु खाँजक लहाता यातायात व्यवसायी तय्गु बलं वनं फसं पुइक यंकल । ३३ केजी लुँ काण्डया तःहिम्हा डा गना वाना ? वाइड बढी खय् ४ अर्ब ३५ करोड भ्रष्टाचारया खाँ नं छानविन मयासें हे क्वचाल । स्वम्हा मन्त्री थ्यागु खाँ प्याहाँ वयवं फुक्क त्वाप्व तिड च्वन ।

भारतं नेपया यक्व थासय् ७० हजार हेक्टर स्वयो अपः जग्गा त्यल काल । थुकियाबारे संसदे भारतीय विस्तारवादया विरुद्धय सःश्वत अले सरकार धःसा त्वाथय् धौ फिड च्वन । नागरिकता थःजगु संवेदनशील विषयता बस व सिनेमाया टिकट स्वयो दांक लाखौं विदेशी (भारतीय) मनूतय्ता भीगु देया नागरिकता इत । तराईया अपलं थासे अजपुं हे नेपःया नागरिकता कयो तःपुं विदेशी तय्गु फुर्ती (प्रभाव) तच्चयो च्वंगु दः । ग्व ? गना द सरकार ? भीगु देशया प्रधानमन्त्री, गृहमन्त्री, रक्षामन्त्री सुयाता दय्केगु धायगु खाँ नयाँ दिल्ली क्वछिइगु ई वल । भीगु संसद औपचारिकता पूर्वाकिगु केनेया लागिं जक दय्क तःगु थाय थेंजक जुय धुंकल । छु थ्वहे खला भीगु स्वाभिमान व स्वतन्त्रता ? फुक्क देशभक्त नेपःमि पिसं गम्भीर जुयो सोचे याय्मःगु ई वय धुंकल ।

छुं ई न्ह्यो निसं भीगू देशया तः तःहांगु भौतिक संरचनात लगानी बोर्ड पाखें दय्केगु याड हल । लगानी बोर्ड

विधेयक संसदे हःबले भीसं थुकिया तस्सिकं विरोध याडागु खः । व साम्राज्यवादीतय्गु लाहातुतिकाथं छयलिगु खाँ भीसं उब्ले हे धायगु खः । अथें यल महानगरपालिकाया प्रमुखपिसं लगानी बोर्डया कारणं सुचुकुचु (सफाइ) नपां मेमेगु ज्या न्ह्याके मफयागु खाँ काड लागनी बोर्ड खारेज याय्मः दक हाल हल । धात्थें हे लगानी बोर्ड खारेज मयातले भीसं तः तः हांगु संरचना स्वतन्त्र जुयो दय्के फैमखु । विदेशी लगानीया नामय् नेपःया राजनीतिक, आर्थिक क्षेत्र बैदेशिक हस्तक्षेप याय्ता हे लगानी बोर्ड खुँलाँचा जुयो ज्यासाड च्वंगु खः ।

नेमकिपां न्ह्याब्लें न्ह्यागुनं निर्वाचनयाता जनतातय्ता राजनैतिक खाँ थुइके बियगु काथं छयल वयो च्वंगु खः । संसद, प्रदेश व स्थानीय तहया निर्वाचने ब्वतिकायो अपलं जनताया सेवा यायगु व समाजवादी क्रान्तिया निंतिं काथंछिंक यंकेगु आजु तयो ज्या साड च्वंगु खः । अः गुलिनं थःता मार्क्सवाद लेनिनवाद धाइपुं पार्टी तय्सं चुनावं हे समाजवाद वै धायो जनता तय्ता भाइगु लाड च्वंगु दः । पूँजीवादी व्यवस्थाय् सत्ताय् वाड धेबा कमेयाड च्वंगु दः । व संशोधनवादी विचः खः । संशोधनवाद पूँजीवाद जूगुलिं नेमकिपां उकिया विरोध याड वयो च्वंगु खः । न्हा व लिपा संसारे पूँजीवादता क्वथल समाजवाद वैगुलि शंका मरु । थव पक्का खः । न्ह्याक्वहे कुतः यासां पूँजीवादी तय्सं न्ह्याबलेंया लागिं थःता ल्यंक तय् फैमखु ।

सरकारं संघीयता थुइक ज्या सानेफःगु नं मरु । संविधानया मतिकायं स्थानीय तहता ब्यगु अधिकार लिता कायो अमिगु ज्याखय् हस्तक्षेप याड च्वंगु लि सरकारता विरोध याड च्वडागु खाः । संघीयताया अर्थ स्थानीय तहता बल्लाकेगु खः । केन्द्रीय तहखे च्वंपिनिगु मने अजनं पुलांगु मानसिकतां थाय् काय्क ज्या साड च्वंगु द । उकियाय्गु नं. विरोध सुरु जुय धुंकल । संविधान व कानूनजक मखु उकियाता छयलिगु (कार्यान्वयन याइगु) थासेया पदाधिकारी तय्गु मानसिकताय् ह्युपा ह्यमागु थौया आवश्यकता खः ।

(नेमकिपाया मूगुथि (केन्द्रीय समिति) या दुजः नपां छवप नपाया प्रमुख सुनिल प्रजापतिजुं २०७५ फागुन ३/४ गते कोहलपुरे जूगु नेमकिपा बाँके जिल्लाया न्हापांगु मुंज्याया उलेज्या ज्याइवसं बियो द्युगु न्वचुया लिघंसाय् -सं)

ख्वपय् त्वाल्य् त्वाल्य् धेबा पुलेम्बःगु व्यायामस्थल

● सविना श्रेष्ठ

रोम्बस स्कूले बुधवार छुट्टी दःगुलिं स्कूलयमा मचात कमलपोखरी लिक्क च्वंगु जिमखानाय् म्हेत च्वंगुलिं छु म्हेत च्वडागु ? दक न्यडा पिं चुल च्वम्हा सञ्जिता तामाडके नं न्यडा । गना म्हेतागु खः दक, मखाडाला तुतीयाय्गु कसरत (ब्यायाम) याड च्वडागु । थौ कन्हे छि ख्वपय् चाह्यु भाल धःसा रोम्बस स्कूलया विद्यार्थी तय्सथें थाय् थासे तयो तःगु कसरतया सामान सितिकं छ्यले फै । सुथाय् वा बहनी डायो थाकुसा लाहातुति तिप्यंके फै । दुगा, पुली तप्यंके फै, कम्मर व प्वाथे च्वंगु दाँ न्याय्केता कसरत याय् फै । अले जिमखाना व योगेथें थाना धेबा पुलेम्बः ।

गुलिं स्वःन्ह थजगु, गुगुं पिंथे, गुगुं मोटरया स्टारिङ्ग थे आधुनिक ब्यायामया उपकरण ख्वप नपा दुने थाय् थासय् तयो तःगु दः । चिच्या चिच्याहिंपुं मचा तय्गु लागिं म्हेत म्हेत याय्गु कसरत न्हेबसा थें । कमलपुखुया ब्यायाम उकि मथ्ये छगू जक खः।

जिपुं आना थ्यें बले ६४ दाया रामसुन्दर शिल्पकार थः छय् मय्जु नपां कसरत याय्ता मेगु सामान (उपकरण) खय् च्वड च्वना । लिक्क छदा दःम्हा वयकया छय्याता म्हेतकं म्हेतकं थः नपां कसरत याड च्वन ।

विशेषयाड थ्व जिपुंथें बुढाबुढी तय्ता अले नसारोग दःपिन्ता तयो ब्युगु खः । बःचाहिंपुं मचातय्ता म्हेतकेगु थाय् नं दत, अले मोबाइलय् जक म्हेत च्वनिगु स्वयो थ्व ब्यायाम याडगु यक्व हे बांलागु जुल वयकं धायो दिल । शिल्पकारजूया धापु काथं ख्वपया छगू छगू वडाय् कसरत याय्गु थाय् व सामान तय्गु योजना नगरपालिकां याड च्वंगु दः । थ्वहे खाँ खःला दक न्यनेता जिपुं नगरपालिकाय् वाडा । मेयर सुनिल प्रजापतिजूया धापु काथं ख्वपया हिगू वडाय् हे शारीरिक ब्यायाम याय्गु थाय् दय्क च्वडागु दः । कमलपुखु (वडा नं. १०), महाकालीस्थान (६), महेश्वरी (७), दूधपाटी (भाजुपुखु वडा नं. १ थिइक) व च्याम्हासिंह (९) खय् ज्या सिधयक ब्यायाम सुरु जुय

धुंकल । अथेहे वडा नं. २, ३, ४, ५ व ७ वडाय् दय्केगु तयारी जुयो च्वंगु दः । ख्वप कलेज व ख्वप इन्जिनियरिङ्ग कलेजे नं ब्यायामखाना तय्ता तयारी याड च्वडागु खाँ मेयरजिं धायो दिल ।

जीपुं विद्यार्थी इलय् थजगु ज्याभः (उपकरण) खय् ब्यायाम याय् मखां । भीसं काय्मखांगु सुविधा न्हगु पुस्ताता छाय् मबियगु ? मेयर प्रजापतिजुं धयोदिल थ्व ज्याभः (उपकरण) खय् भीगु शरीरया फुक्क अड्गया ब्यायाम याय् ज्यु । छकया हिन्ह्यम्हा (१७) सिनं थ्व उपकरणखय् ब्यायाम याय् फै ।

अः ब्यायाम सेट दय्कागु थासय् “रनिड मेसिन” मरुनि । ल्यं दःनिगु थासय् वनं तय्गु योजना दः । थ्व नेलाया दुने फुक्क थासय् शारीरिक ब्यायामया उपकरण तय्गु योजना दःगु खाँ मेयरज्युं धायो दिल ।

मेयर प्रजापतिजूया धापु काथं “थ्व ज्याइवः (उपकरण) तय् हाँ गुलिनं थःगु थिइक च्वंगु “जनस्वास्थ्य सेवा केन्द्र” फिजियोथेरापी याय्ता वानिगु । व फुक्क सर्वसाधारणया क्षमता (पहुँच) पिनेला । छुं दा न्हयो अमेरिकाय् भःबले वयकं थाय्



ख्वप कमलविनायके ख्वप नगरपालिकां तयो ब्युगु ब्यायामया सामानखय् ब्यायाम (कसरत)याड च्वंगु सीता लक्ष्मी प्रजापति व वयकया छयःया किया - सविना श्रेष्ठ सेतोपाटी

थासय् शारिरीक ब्यायामया उपकरण तयो तःगु खँगु जुल । अजगु उपकरण थःगु थासय् नं तय्गु वयकया मति जुल । ल्याहाँ भ्नाय्धुनेवं नगरपालिकाया थाय् थासय् अजगु शारिरीक ब्यायामया उपकरण तय्गु मति वल । दांगु, अःपुक अले बल्लागु सामान गना दै धाय्गु खँ सुनं मस्य् ।

खुलाति न्ह्यो छम्हा म्हासियाम्हा कासामिं कट्टुञ्जे च्वम्हा छम्हा मनूयाके अजगु उपकरण दःगु सूचं बिल । जिपुं मथाहे आना वाडा । बाँलागु ज्याखय् छाया लिपा लाकेगु ? प्रजापतिजुं धायोदिल । व मनूयाके धाल्थे हे ब्यायाम याय्गु ज्वलंछि हे सामान (सेट) दगु जुयो च्वना । जिमिसं व उपकरण स्वया । अले दकले न्हापां जिनिं म्हेत स्वया ।

मेयर प्रजापतिनपां भःपुं सकलसिता व उपकरण तस्कं यल । आनानं ल्याहाँ वय हाँ वयक व मनूयाके न्यडदिल-जिमिता थजगु ज्वलंछि (सेट) हाय्विय् फैला थँ ? चिनिया सामानया व्यापारी वय्कं ४५ दिनया दुने ह्यो वियगु बचं बिल । ४५ न्हु मखु लच्छीया दुने हे जिमित ज्वलंछि उपकरण हाय् बिल । अले दकले न्हापां १ वडाय् अले छसिकाथं मेथाय् ब्यायाम उपकरण तथा ।

न्हापां डागु ज्वलंछि उपकरण जक मागे याडागुया मू १ लाख ८४ हजार तुगुखः । अः भः थिके जुयो २ लाख स्वयो अप्वः तुगु खँ नं प्रजापतिजुं काडु दिल । वयकया धापु काथं थजगु उपकरण तय्ता सार्वजनिक थाय्या अभावं यक्वथासय् तःय थाकुयो च्वंगु खः अथेनं. फच्छिं फक्व मिलेज्गु थाय्माल तय्गु योजना दःगु खँ कँ दिल । सुथाय् त्यलं चाह्य्वांसा माहेश्वरी देग लिक्कया उगू ब्यायाम स्थले स्वयम प्रजापतिजु हे खाने दै ।

जिगु छँ हे माहेश्वरी थिक खः । जि परिवारनापां ब्यायामया लागिं आना वानेगु । वयकं धायोदिल - थमनं नं याडु स्वयमाल न्हुगु उपकरण म्हेते सय्केमाल । मेपिन्ता गथे जुई धाय्गु खँ थमनं म्हेतनं. अनुभव याय् फै ।

विहीबार जिपुं आना वाडाबले वयकता नपामला । बरु कमलविनायके छपुचः मचात अपलं ल्यासे ल्हाम्होपुं,



शारीरिक ब्यायामया ज्याभःतः

बुढाबुढीपुं थुगु उपकरणता छयल ब्यायाम याडु च्वना ।

७३ दँया सीतालक्ष्मी प्रजापति अपुं मध्येया छम्हा खः । वयक बाचाहिपुं मचात म्हेत च्वंथाय् भ्नाल । वहे पिंचुलेगु थजगु उपकरणखय् ब्यायाम याडु दिल । तुति स्यागु ल्वय्या कारणं थुगु ब्यायाम याडागु खँ कडु दिल । सुथाय् देके वानेगु अले ब्यायाम याडु छँ ल्याहाँ वानेगु । ज्यू बांलाइगु धःगुलिं वयागु खँ वयकं कडु दिल ।

४३ दँया महेन्द्र थकाली धःसा न्हापा “मर्निड वाक” या लागिं कमलपोखरी वडुगु अले खिपया “स्किपिड” म्हेतिगु । अः नगरपालिकां व्यवस्था यागु आधुनिक उपकरणखय् ब्यायाम याय्गु खँ वयकं कडुदिल । अथेहे ५२ दाया हरिकृष्ण तुल्सीवाख्योया न्हापा नसा च्यापेजुगु अनेक उपचार याडानं, योग याडानं थीथी अस्पताले वाडानं, वास नयानं बांलाक मलां । छँ थिइक ब्यायाम याय्गु थाय् दयानिं अःथाना हे वयो ब्यायाम यो वय्गु । न्हयानिं ब्यायाम याय् दःसा ज्यू बांलाइ । छगू जक उपकरणे मखु फुकंगुली याय् फःसा जक बांलाइगु जुगुलिं भति भति जूसां ई बियो ब्यायाम याय्म । इलं लात धःसा उकि याय्गु नं छुं हे चिन्ता मरु । छाया धःसा नगरपालिकां मःछि फुकक किसिमया उपकरणत तयो ब्यूगु दः ।

सेतोपाटी पाखं ल्हयो कायागु

सेतो पाटी प्रकाशित, न्हि ल्या - बिहिबार फागुन ९, २०७५ ।

‘खवप अस्पताल छगू आधुनिक अस्पताल काथं हज्याइ’

● उपप्रमुख रजनी जोशी

नेमकिपाया निर्देशनकाथं न्ह्याक वयो च्वंगु खवप नगरपालिकाया मू आजु पुर्खा दय्कतकगु सम्पत्ति भीगु कला व संस्कृतिया नारा ज्वड ज्ञान विज्ञानया केन्द्र दय्केगु अभियान खः । थ्व खाँ थाना कड च्वने मालिथें मच्वं । थौंया थ्व भिं दिं विशुद्ध देश व जनताया सेवाख्य लगेजुयो च्वंपुं भी जनप्रतिनिधिपुं, प्राविधिकपुं नपां समाजसेवी पिनिगु नितिं तस्कं महत्वपूर्ण अले ऐतिहासिक क्षण खः । लुमांके बहःगु ई खः । थौं नेमकिपां मति तयो तःगु छगू तस्कं महत्वपूर्णगु छगू लक्ष्य निस्वांगु दिं गुगु दिं या म्हागस (परिकल्पना) भी पूर्वजपिसं खांगु खः वहे काथंया खवप अस्पताल दय्केगु ज्याया पला थौं न्ह्याक च्वंगु खः । थौं भी तस्कं योम्हा हानेबहम्हा नेता नेमकिपाया नायो भाजु नारायणमान बिजुकछेंजु पाखें निस्वानिगु थुगु ज्या भ्वः ख्य भ्नायो द्यपुं सकलसिता भिंसुथ नपां लसकुस याड च्वडा ।

थौं जि तस्कं लय्ताया अले जि तस्कं भावुक जक मखु गौरव नं ताय्क च्वडा । छाय्धसा जि थाना छिक पिनिगु हःने छम्हा आर्किटेक्ट नपां उपमेयर काथं दाँ वयो च्वडा । जि उपमेयरया नातां नगरनिर्माण व जनताया सेवायागु लक्ष्य ज्वड वयागु खःसा छम्हा आर्किटेक्टया नातां थुगु योजनासं थःनं दुथ्याड खवप कलेज अफ इञ्जिनियरिङ्ग व खवप इञ्जिनियरिङ्ग कलेजया पुनःनिर्माण समितिया फुक्क आर्किटेक्ट इञ्जिनियरिङ्गपाखें थुगु ज्या जुयो च्वंगु खाँ ब्याक च्वडा । छुं नं आर्किटेक्ट इञ्जिनियरिङ्गपिन्ता थजगु ज्या वरदान थें हे जुइगु खः अले थजगु ज्या सिधलकिं व गौरबया अनुभव जुई । गुकिं मनय् स्वं हवइ । थुगु ज्याभ्वः भीगु नगर अले देशयाय् गौरव जुइ, थुगु अस्पताले देशं देछिया ल्वयया उपचार याय् खानी । थ्वहे जिपु जनप्रतिनिधिपिसं याडागु वाचा जगुलिं थ्व ज्या पूर्वाकेता जिपुं थाकु मचसैं हज्याय्गु बचं बियो च्वडा ।



खवप अस्पताल छगू आधुनिक अस्पताल काथं हज्याइ । थुगु अस्पताल खवप नपां स्वास्थ्य मन्त्रालय पाखें स्वीकृति कायो २५ गू शैया दैगु अस्पताल काथं हज्याकेगु खाँ ब्याक च्वडा । लिपा थ्व सच्छिगू शैय्याया जुइ । थुगु अस्पताले मिखाया उपचार नपां आधुनिक अस्पतालया काथं मथां हे भीगु हःने दय्केगु बचं बियो च्वडा । मथां हे भीसं थानासं ल्वय्या उपचार याय् खानी ।

थ्व अस्पतालया बारे छुं खाँ न्हिथाने ताडा । भवन १० (रोपनी) पि, १२ गू आना ३ पैसा २ दामया क्षेत्रफले जनस्वास्थ्य भवनया उत्तरपाखे दय्क च्वडागु खः । थ्व खवप अस्पताल basement नपांया जुइ । भवन नपां basement या ब्या (क्षेत्रफल) ३ रोपनी १५ आना १ पैसा ०.७१ दाम दैसा जमिनं च्वय् छुं दानेगु जक २ रोपनी १० आना १.९२ दामख्य दैगु नपां प्रचलित मापदण्ड काथं डाता (पाँच तल्ला) जःगु जुइ ।

गुगु basement य् २८ गः गाडी व ४५ गः मोटरसाइकल दिक् (पार्किङ्ग) याय् फै । अस्पतालया वस हियेता Laundry mechanical room, central oxygen supply room, Maintenance room, electrical room, store room, नपांया व्यवस्था थुगु अस्पताले दै नपां छेली

तल्लाय् १० गू बेडया इमर्जेन्सी, अले Ray या CT Scan, MRI/patahology Lab नपां mortuary शवगृह (सीपुं तइगु कोठा) दै । मातं तल्लाय् (पहिलो तल्ला) Ultra sound, Video x-ray या व्यवस्था नपां मचाबुइकिगु Maternity Ward कोठा दै । चोता तल्ला (दोस्रो तल्ला) य् नेगू Operation theater (Major/Minor) व्यवस्था दै । थ्व हे तल्लाय् ICU लगायत बिरामी पिड् च्वनिपुं कुरुवात च्वनिगु कोठा दै । वनं च्वय्या स्वंगूगु तल्लाखय् मिखाया अस्पतालया लागि छुटे याय्गु प्रस्ताव याडागु खः । व स्वयो च्वय् प्यंगु तल्लाखय् १५० म्हा न्हेयांगु multipurpose हल व २२ म्हा न्ह्योगो बैठक कोठा व प्रशासन च्वनिगु प्रस्ताव याडागु खः । नपां थ्व अस्पताल वातावरण मैत्री, अपांग मैत्री जुइगु खाँ नं ब्याक च्वडा । थुगु अस्पतालया नितिं याय् ताडागु खः । गुकिं याड् नाःया छुं भति समस्या म्हव जुइ नपां सौर्य ऊर्जा (Solar Energy) याता अपलं छय्लेगु जुइ । धेबा लगानी स्वयो थ्व अस्पताल भी नगरबासी तय्या नितिं सेवा व सुरक्षायाता ध्यान दय्कागु खाँ ब्याक च्वडा । अथे नं जिमिसं काँथुप्वः स्वयो क्वेँ घुतिनेमः धाय्गु खाँ थुइक Reasonalbe बजेटं अले बल्लाक, भिंक गुणस्तरीय निर्माण व सेवा बिय्गु आजुं

थ्व अस्पताल दय्केगुलिं हज्याड् च्वडागु खः ।

थुकिं तुइगु लागत जगनिसें जमिनतला (Tie beam, basement plinth) तकया इस्टिमेट १२ करोड ६९ लाख ९२ हजार ७९४ तका दां Plinth तुइगु गुगु ज्या असार तकखय् सिधय्किगु लक्ष्य तयागु खः । Plinth स्वयो च्वय् फुक्क भवन जाइबले भण्डै अनुमानित दां ४५ करोड तुइगु थुकिया detail analysis जुयो च्वंगु खाँ नं थाना ब्याक च्वडा ।

जिमिसं थुगु छवप अस्पताल स्वदाया दुने सिधय्क सेवा बिय्गु मति तयागु खः । थुकिया नितिं थुगु ज्याभ्वखय् खानेदय्क (प्रत्यक्ष) लगे जुइपुं सकलं सरोकारवालापुं नपां सकल नगरवासीपिनिगु दुग्यंगु र्वाहाली फ्वड् च्वडा । नपां भिं ताय्क च्वपुं सकल शुभचिन्तकपुं नपां पाछ्यूछय् वानेगु खाँ नं ब्याक च्वडा । थथे याय् फःसा जकभीसं इलय् हे आजुइ थ्येके फै । भी जनतातय्सं भीथाय् हे थःगु स्वास्थ्य उपचार अःपुक याय् फै अले स्वस्थ नागरिकपाखें थःथःगु थासं देया विकासया नितिं स्थानीय सरकार नपां ल्हापा स्वास्वाँ हज्याय् फै ।

(२०७५ फागुन ९ गते छवप अस्पताल निस्वानेगु ज्या भ्वसं छवप नपाया उपमेयर रजनी जोशीज्या लसकुस न्वचु)



ज्याभ्वःखय् भायो दिपुं



स्वप नगरपालिकाया प्रमुख सुनिल प्रजापतिजुनं २०७५ माघ ५ गते नेपालगञ्ज उपमहानगरपालिकाया प्रमुख धवलशमशेर राणा नपां नपा लाड दल ।

ति बाखा

बुँया ल्वापु

● आशाकुमार चिकंञ्जार

बुँया तिसा किसान खः । किसान मजुगु बुई बाली सै मखु । घाँय् जक वुइ । वयागु हि चःतिं मप्यागु बुँ बाँभ जुई । उकिं किसानया आधारनं बुँ खः । न्हपानिसैं थःगु नुगः थें मायायाड तःगु बुँया मनय् अनेक बाली सः । नुगलय् स्वं हव । चं चं धःगु नुगः ब्व ब्वं थिइक च्वंगु बाँभ बुँ याके न्यन - छंम्हा म्हवेनं छंता छाय् बाली मयागु ले ? वं दुःख काँकां धाल - छ व जि नपां जूतले भी गुलि “धिं धिं बल्ला याड बाली सय्केगु ।

आहा छंम्हा मांया मुले मचा म्हेत च्व थें गुलिजक हिसी दः । स्वयहे याय्पुसे च्वं । अःयां जिगु म्हाय् स्वयो, न्हाकं च्वाकं जक बुयोवल । म्हाछिं हे च्वा च्वा जक सुइगु । ख्वाखं पुड तितुमतु तिइगु । उलिजकला प्लाष्टिकया भोलां

सास ल्हाय् हे थाकुल । छु छु कानून वला हँ । छ म्हवे दखे जि बुथु दखे भाग लाता हँ । बाली नयो च्वंम्हा बुथुं जिता सुयाता सुयाताजक मिला हँ । उकिं जिगु म्हाय् न्हाकं च्वाकं जक बुइक तल । जियां कुष्ठं थ्युम्हाथें । छ स्वयो जौवनया ल्यासे थें । सकल प्राणीया आधार । जिगु मातृत्व हे हरण जुइगु कानून दय्कम्हा सरकार गतिलाइ मखु । स्या नुगः या सरा गथे मग्यली थेंक । अभ अन्न उत्पादन मता जक हः जुइगु ? कम्प्युनिष्ट धःपिसं बु याइम्हासिता हे जग्गा विय्मःगु मखुला ! श्वमिगु बुद्धिं देनं ब्वथली तिनी ला !

बुँ नेक्वया नुगः खाँ न्यड जिगु दे या कप क्वछुत । सुयागु जोत वाय्गु हे पोत धाय्गु कम्प्युनिष्ट नारा भन भन बुलुयो वान ।

स्वप नगरपालिकाया ज्या भवः त

स्वप नपा प्रमुख सुनिल प्रजापतिजुनपां नेपाल “ल” क्याम्पस प्रमुखया खँहाबल्हा

२०७३ माघ २३ गते बुधबार ।

स्वप नपा प्रमुख सुनिल प्रजापतिजुनपां नेपाल “ल” क्याम्पसया क्याम्पस प्रमुख डा. डि. एन पराजुली नपां नगरपालिकाया सभाकक्ष नपालाड दिल् । उगु इलय् क्याम्पस प्रमुखजुं नेपाल “ल” क्याम्पसया भवन निर्माणया नितिं प्राविधिक सहयोग बियो दि धाय्गु आशा याड द्युगुलिं सुभाय् देहासे प्रमुख प्रजापतिजुं स्वप नपां थःगु हे मौलिक पहःया मठ-देगः निजी छँ दानेगु लि बःबिसे प्राचीन स्मारक थःगु सम्पदा भःपियो स्थानीय जनताया ग्वाहाली नपां ल्हवनेगुलि उपभोक्ता समिति पाखें ज्या साड च्वडागु खँ ब्याक दिल् । वय्कं स्वप दे याता ज्ञान विज्ञान व साँस्कृतिक नगर दय्केगुली बः बियो ज्यासाड च्वडागु खँ कड दिल् । स्वपया प्राचीन सम्पदा भीगु अतुलनीय सम्पत्ति

खः धायो द्युसे पराजुलीजुं प्राविधिक सहयोग मागे यागुलि थःपुं सकारात्मक जुयागु खँ प्रमुख प्रजापतिजुं कड दिल् ।



सहिद दिवशया लसताय् जूगु पत्रकार सम्मेलन

२०७५ माघ २४ गते बिहीबार ।

स्वप नगरपालिकाया ग्वसालय् सहिद दिवशया लसताय् जुइगु (फागुन ५-८) अन्तरनगर करँते धिं धिं बल्ला कासा २०७५ या ज्याइवःया बारे छगू पत्रकार सम्मेलन याड क्वचाल ।

उगु सम्मेलनसं प्रमुख सुनिल प्रजापतिजुं सहिद दिवसया लसताय् वयक पिनिगु लुमन्ति व सम्मानस दाय्दँसं “अन्तरनगर धिंधिं बल्ला कासा ग्वसः ग्वयो वयो च्वडागुया मू आजु राष्ट्रिय व अन्तर्राष्ट्रिय स्तरया कासामीत तयार याय्गु खः धायो दिल् । ल्याम्होपुस्ताता कासाया लागाय् हःचिइकेगु मतिं स्वप नपां फुटबल, भलिबल, बक्सिड, करँते व टेबुल टेनिसकासा बाँलाक सय्के बियता तालिम बियो वयो च्वंगु खँ काड दिल् ।

वय्कलं नगरया हिंगुंतुं वडाय् कासा पुचः (खेलकुद समिति) निस्वाड कासाया गतिविधि वडानिसँहे थाकाय्गु मति खः धायोदिसँ दाय्गु छगू अन्तरनगर धिं धिं बल्ला कासा याय्गु क्वछिडगु काथं थुगुसी अन्तरनगर करँते धिं धिं बल्ला कासाया ग्वसः ग्वयागु खँ कड दिल् ।

प्रमुख प्रजापतिजुं स्वप नपाया प्रशासन पारदर्शी याय्ता नपाया ज्याइवःत भक्तपुर मासिक, भक्तपुर खबर डट कम, स्वप पौ, स्वप सः नपांया थी थी सञ्चार माध्यमं जानकारी बियो च्वडागु खँ कड दिल् । वयकलं छम्हा मनूजक मखु समाज हे परिवर्तन याय्ता अनुशासित नागरिक दय्क अन्तर्राष्ट्रिय (खेलाडी) कासामित तयार याड अमिपाखं संसारे हे भीगु देयाता म्हासिइके वियगु मति खः धायोदिल् ।

अथेहे उपप्रमुख रजनी जोशीजुं न्हूगु पुस्ताया ल्यासे ल्याम्हो पिन्ता अनुशासित व देश व समाजया उत्तरदायी मनु दय्केता कासाया धिंधिं बल्ला ग्वसः ग्वयागु खँ कड दिल् ।

उगु ज्याइव खय् १८ गू नगरपालिकां नां च्वके धुंगु २५ गते तक नां दुतिनेगु ई (म्याद) दःगुलिं अभ्र अप्वःसिनं ब्वतिकाइगु सम्भावना दःगु खँ नपां उगु ज्या भवःता २८ गू लाख बजेट क्वःछिडागु खँ कड दिल् । उगू ज्या इवसं वडा नं १ या वडाध्यक्ष वडा तथा खेलकुद समितिया नायो श्यामकृष्ण खत्रीजु व वडा नं ७ या वडाध्यक्ष उकेश कवांजुं थःगु नुगः खँ प्वक द्युगु खः ।

‘ख्वप इन्जिनियरिङ्ग कलेजया विनियम २०७५’ बारे बिहीबार सल्लाबल्हा

२०७५ माघ २४ गते

कलेजया विनियमया विषयले प्राध्यापकपुं नपां सल्लाबल्हा यासे ख्वप नपा पाखें न्ह्याकचवंगु ख्वप इन्जिनियरिङ्ग कलेज व ख्वप कलेज अफ इन्जिनियरिङ्ग कलेजया विनियम २०७५ बारे बिहीबार सल्लाबल्हा जुल ।

उगू ज्याइवसं ख्वप नपाया प्रमुख सुनिल प्रजापतिजुं म्हवजक धेबा कायो देशादेछीया विद्यार्थीतय्ता बांलागु शिक्षा बियो चवडागु खाँ काड भी मेपुं नगरपालिका स्वयो थुगु लागाय् पागु खाँ कड दिल । आर्थिक उदारीकरणया नामे

निजी क्षेत्रता राज्यं शिक्षाया जिम्मा ब्यूगुलिं सरकारी कलेज बांलागु शिक्षा बिय मफगु खः । भीसं प्यकगु नगरसभां ख्वपय् स्थायी बास याड च्वंपिता दसिपौ (सर्टिफिकेट) धितो तयो आखः बवनेता ५ गू लाख तका तक ऋण वियगु खाँ नं कडदिल । नपां कलेजे ज्या सानिपुं कर्मचारी, प्राध्यापक तय्सं इमान्दारीपूर्वक ज्या सानेमःगु खाँ नं ब्याक दिल ।

उगू ज्याइवसं कलेजया प्राचार्यपुं सुजन माक व सुनिल दुवालजुं कलेजया विनियमे चवयो तःगु खाँत धवाथुइक बिल ।

विद्यार्थीत राजनीतिक ज्ञानं सचेत जुयमः

२०७५ माघ २४ गते

ख्वप नगरपालिका पाखें न्ह्याक चवंगु ख्वप बहुप्राविधिक अध्ययन संस्थानया १५ कगु बुदिया लसताय ग्वसाग्वःगु ज्याइवसं हानेबहम्हा नेमकिपाया नायो अले वरिष्ठ राजनीतिज्ञ नारायणमान बिजुकछँजुं देश व समाजयाता हचिइकेगु खःसा निस्वार्थ रुपं ज्यासानिपुं अनुशासित ल्यासे ल्याम्होपुं दय्मःगु खाँ कड दिल ।

शिक्षा उत्पादन व श्रम नपां ज्वः लाके मःगुलि सरकारं थुखेपाखे ध्यान तय्मफगु न्हगु पुस्तां राजनैतिक उद्देश्य तयो थःगु आजु ल्यय्मःगु खाँ धवाथुइक बिल । भीगु दे अः लाँबिम्हा मनूथें हज्याड चवंगुलि चिन्ताप्वक द्युसें थःन्हयागु हे क्षेत्रयाय्म्हा जूसां थमनं सय्कागु ज्ञान थःगु देश व समाजया निती छयलिपुं ल्यासे ल्याम्हो त माल चवंगु खाँ नं कडदिल ।

उगू ज्या इवसं ख्वप नपाया प्रमुख एवं कलेज सञ्चालक समितिया नायो सुनिल प्रजापतिजुं दांक (न्यून शुल्क) गुणास्तरीय व सीपमूलक शिक्षा बियो चवंगु खाँ कड दिल । जनताया काय्म्हाय्पिसं राजनीति मयासा शोषक सामन्तया लाहातय् राजनीति लाइगुलिं बाँलापुं मनू राजनीति वयमःगु खाँ कडदिल ।

अथेहे नेमकिपा प्रदेशसभा सदस्य सुरेन्द्रराज गोसाईजुं देश व जनताया दुःख थूपुं मनूत राजनीतिखय् वसा देशया भविष्य बाँलाइगु खाँ कड दिल । अथे हे नेमकिपाया प्रदेश



सभाया सदस्य सृजना सैजुजुं मिसामस्त राजनीतिक रुपं सचेत जुयो देश व जनताया निती हज्याय्मःगु खाँ कड दिल । अथेहे उपप्रमुख रजनी जोशीजुं थमनं सय्कागु शिक्षां देश व समाजया सेवा याय्मःगु खाँ कड दिल । ख्वप नपाया उद्देश्य ख्वपता स्वच्छ सफा व शिक्षाया केन्द्र दय्केगु खाँ नं ब्याक दिल ।

अथेहे सिटिइभिटीया उपाध्यक्ष कुलबहादुर बस्नेत नपां भक्तपुर क्यान्सर अस्पतालया निर्देशक ऋषिकेश श्रेष्ठजुं थःगु नुगाखाँ प्वक दिल । ख्वप बहुप्राविधिक संस्थानया प्राचार्य रत्न सुन्दर लासिवाजुं ख्वप नपा पाखें न्ह्याकचवंगु कलेज शिक्षा क्षेत्रे नमुना खः धायोदिल । उगू ज्याइवःखय् मूपाहां बिजुकछँजुं तःलापुं विद्यार्थी पिन्ता सिरपा लःल्हाड द्युगु खः ।

“भक्तपुर रेटिना अध्ययन प्रतिवेदन” पिब्वल



२०७४ माघ २८ गते

नेमकिपा केन्द्रीय नायो हानेबहम्हा नारायणमान विजुकछें (रोहित) व खवप नगरपालिका प्रमुख सुनिल प्रजापतिजुं “भक्तपुर रेटिना अध्ययन प्रतिवेदन” छगू समारोहया दशवी नेम्हासिं पिब्वयोदिल ।

उगू ज्याइवसं मूपाहां विजुकछेंजुं राजनैतिक कार्यकर्तापिसं मिखा व मेमेगु ल्वयया खाँ थुइक जनताया सेवायाय् मःगु नपां मास्तरतय्सं मचातयता मस्तनिसं हरेक खाँ स्यनेमःगु गुगुखाँ लिपाथेंक लुमाँसे वडगु खाँ थः रौटहटे आखः ब्वडाबले (६/७ तगिंखय्) मिखादानया ज्याइवःले स्वयम्सेवक जुयागु खाँ कड दिल् ।

अथेहे प्रमुख प्रजापतिजुं खवपय् मिखाया स्थितिया अध्ययन याड द्युगुलिं डा. थापा लगायत पिन्ता शुभाय्

देछायो जनताया छें छें नर्सिडग सेवा न्हयाकागु व वयक पिनिपाखें थी थी ल्वयया जनचेतनामूलक ज्या इवः न्हयाकेगु बिचः प्वंक दिल । थी थी ल्वययता शिविर न्हयाक वयागु नपां थौया प्रतिवेदन खवपया जनताया मिखाया स्थिति थुइके अःपुइगु विश्वास प्वंक दिल ।

उगु ज्याइवसं भूपू डिन पृथुचरण वैद्य डा. सुमन शम्शेर थापा, अध्ययता रबा थापां भक्तपुरया अध्ययनबारे जानकारी ब्यगु खः ।

डा. रबा थापां खवपे २१०० म्हा नागरिक नपां ३ दा बिक अध्ययन यागु खः । ज्याइवः खय् भक्तपुर जिल्ला सामुदायिक आँखा केन्द्रया प्रमुख धिरज अधिकारीं उपचारया बारे न्वचु वियो द्युगु खः ।

मिनर्वा स्कूलया अभिभावक दिवश



२०७५ माघ २८ गते

विदेशे सयूक वगु सीपं स्वदेशया सेवायाय् मःगु खाँ खवप नपाया प्रमुख सुनिल प्रजापतिजुं मिनर्वा स्कूलया अभिभावक दिवशे काड द्युगु खः । वयकलं तःहाम्हा मनू स्वयो भिम्हा नागरिक जुयो देश व जनताया सेवा याय्मःगु खाँ कड दिल् । थी थी व्यक्तित्व पिसं नुवाड द्युगु उगु ज्याइवसं मूपाहां प्रजापतिजुं साँस्कृतिक गुरुपिन्ता सम्मान व एसईई पास जुपिन्ता मतिनाया चिं लःल्हाड दिल् ।

जिल्लास्तरीय कर्मचारी मुंज्या

२०७५ माघ २९ गते



नेपाल कर्मचारी समाज ख्वप जिल्ला समितिया ग्वसालय जूगु जिल्लास्तरीय कर्मचारी मुंज्यास ख्वप नपाया प्रमुख सुनिल प्रजापतिजुं कर्मचारीसमाजं राष्ट्रिय अन्तर्राष्ट्रिय घटना थुइक कर्मचारी पिन्ता शिक्षित यायमःगु खाँ कड दिल ।

शैक्षिक स्तर थाकाय्ता पाठ्यक्रमे ध्यान बियम

२०७५ फागुन १

एभरेष्ट इङ्गलिस स्कूलया ३६ गु बुँदिया लसताय् मू पाहाँ ख्वप नपाया प्रमुख सुनिल प्रजापतिजुं शैक्षिक स्तर थाकाय्ता पाठ्यक्रमे ध्यान बियमःगु, विद्यार्थीपिन्ता अतिरिक्त क्रियाकलापे ब्वति काय्के मःगु खाँ कड दिल । ख्वप नपाया सरसफाइ (सुचुकुचु) ज्या भ्वः खय् स्कूलपिसं यागु ग्वाहाली उत्साहजनक धायो दिसे फोहरता धेबा वैगुलि छय्लेगु विषय सल्लाहबल्हा जुयो च्वंगु खाँ कड दिसें विद्यार्थी तयसं देश व समाजया नितिं ज्या सानेगु आजु तयमःगु खाँ नं कड दिल ।

स्कूलया संस्थापक प्रिन्सिपल भक्त राजभण्डारीजुं नं न्वचु बियो द्यगु उगु ज्याभ्वसं मू पाहाँ प्रजापति जुं बुदि कोष २०७५ रे मुड तःगु धेबां न्याड तःगु साफु स्याडजाया श्री हिमाल माध्यमिक विद्यालय व डोटीया श्री पद्म पब्लिक मुक्तिनारायण माविया प्रतिनिधि पिन्ता लःल्हाड दिल ।

नियमित सरसरसफाइ

२०७५ फागुन १

ख्वप नगरपालिकाया ग्वसालय जुइगु सहिद दिवसया अवसरे जुइगु अन्तर नगर कराँते प्रतियोगिता २०७५ याता ग्वाहाली जुइकाथं नियमित सरसरसफाइया ज्या भ्वः भनपा २, सहिद स्मृति खेल मैदाने फागुन १ गते न्ह्याकल । वडाध्यक्ष (९) या रविन्द्र ज्याख्वः जुं थुगु ज्याखं जनता लय्तःगु खाँ नपां चेतना वयो च्वंगु खाँ कड दिल । उगु ज्या भ्वः २०७५ फागुन ५ गते निसें ७ गतेतक जुइगु खः ।



गैरसरकारी संस्थां शासकतय्ता भ्रष्ट याड च्वंगु दः

२०७५ फागुन ३

बाँके, 'जनताया प्रजातन्त्र, समाजवाद व साम्यवादया नितिं संघर्ष याय्नु' धाय्गु नारा ज्वड बाँके या कोहलपुर नगरपालिकाय् नेमकिपाया केन्द्रीय दुजः अले ख्वप नपाया प्रमुख सुनिल प्रजापतिजुं उलेज्या यासे ओली सरकारं कम्युनिष्ट चरित्र क्यने मफुगु, निजीकरणता कःघाड उकिता निरन्तरता ब्युगु नपां अन्तर्राष्ट्रिय गैरसरकारी संस्थां शासकतय्ता भ्रष्ट यागु खाँ काड दिल । काँग्रेस प्रतिपक्षया भूमिका स्थल्लाक हज्याके मफूगु, गुण्डा तस्कर व ठेकेदारया लाहातय् देश लागु व भारतीय दूतावासया योम्हा मन्त्री जुइगु ज्याखं प्रजातन्त्र माकया लाहातय् नैक्यथें जूगु खाँ कड दिल । उकिं समाजवादी व्यवस्था निस्वानेया नितिं नेमकिपा मदिसें संघर्ष याड (ल्वाड) च्वंगु खः । वयकलं राजनैतिक व सैद्धान्तिक रुपं जनतातय्ता सचेत याडः समाजवादी आन्दोलनता हज्याके मःगु खाँ कड दिल ।

उगु ज्या भ्वःसं कैलाली जिल्ला समितिया नायो रमेशकुमार रावल, बर्दिया जिल्ला समितिया नायो हरिलाल न्यौपाने, सुर्खेत जिल्ला समितिया सचिव धनेन्द्र बिकजुं नं थःगु नुगः खाँ प्वंक द्यगु खः ।

कर्मचारी समाजे लासिवा



समाजया नायो गौतम लासिवाया नायोलय् जुगू खः ।

सम्मेलनया बन्द सत्रे नेमकिपाया सचिव एवम् सांसद प्रेम सुवालजुं प्रशिक्षण बियो द्यूगू खः ।

प्रशिक्षणया भ्वलय् वयकं संसदे प्रस्तुत जूगू कर्मचारी समायोजन विधेयकयबारे

२०७५ फागुन ४

नेपाल कर्मचारी समाजया नेकगू राष्ट्रिय सम्मेलनया उलेज्या नेमकिपाया नायो हानेबहम्हा वरिष्ठ राजनीतिज्ञ नारायणमान बिजुकछैजुं याडु दिल । उगू ज्या भ्वः सं वयकं समाजवादी विचार हज्याके मफूसा पुँजीवादी विचारे थाय् काइगु जुगुलिं थःगुजक स्वार्थ स्वइगु पुँजीवादी विचः त्वः त फुक्कसिया भिंजुइगु समाजवादी विचः याता कय्च्याय् मःगु खाँ कडु दिल । व्यक्तिगत नाफा काइपिसं याडु सरकारी निकायता ज्या मछिंक हःगु खाँ नं कडु दिल ।

सत्ताय्वापुं पुँजीवादी राजनीतिक दलं देशयाय्गु सार्वजनिक सम्पत्ति निजीकरणयाडु भारतीय एकाधिकार पुँजी याय्गु हे सेवा याडु च्वंगु खः धायो दिल । उकिं पुँजीवादी व्यवस्थां अपलं जनताया शोषण याइगु जुगुलिं व्यापक जनताता भिंयाइगु समाजवादी व्यवस्था ह्यता ज्या सानेमःगु खाँ कडु दिल । सिद्धान्त व विचार अपलं जनतां मथुतले क्रान्ति मजुइगु खाँ कडु दिसे जनतातय्ता समाजवादी विचारं प्रशिक्षित याय्मःगु खाँ कडु दिल । अध्यक्ष बिजुकछै जुं संसद सदस्यतय्ता निवृत्तिभरणया व्यवस्था याय्तांगु ज्या जनताया भावनाया अखः खः धायो दिसें धेबा व नाफाया निंतिं राजनीति याइगु पुँजीवादी व्यवस्था खः धायो दिल ।

उगू हे ज्या भ्वसं नेमकिपाया केन्द्रीय सदस्य डिल्लीप्रसाद काफ्ले, मेम्हा केन्द्रीय सदस्य नन्दबहादुर शाही, खप नपाया उपप्रमुख रजनी जोशी नपां थी थी समाजया अध्यक्ष पिसं थःगु नुगः खाँ प्वंक द्यूगू खः । उगू सम्मेलन नेपाल कर्मचारी

घवाथुइक ब्यूसें संघअन्तर्गत ४७ हजार कर्मचारी ह्यो प्रदेशे २२ हजार जक कर्मचारी तःगु संघीयताया भावना विपरीत जुगु खाँ कडु दिल ।

सचिव सुवालजुं देशे भ्रष्टाचार बढे जूगुया जिम्मा नपां कर्मचारी संयन्त्रपाखें जूगु बदमासीया जिम्मेवार प्रधानमन्त्री व सत्तासीन दलं हे काय्मः धायो दिल ।

उगू ज्या भ्वसं नेमकिपाया वैकल्पिक केन्द्रीय सदस्य राजेन्द्र चवाल, मजदुर दैनिकया सम्पादक प्रकाश थुसा, खप इ. कलेजया प्राचार्य सुजन माक, कानुन अध्ययन समाजया अधिवक्ता अनिता जधारीजुं थी थी विषय प्रशिक्षण बियोद्यूगू खः ।

उगू सम्मेलनं गौतमप्रसाद लासिवाया नायोलय १५ म्हा दुजः दःगु मू गुथि निःस्वान । निस्वाने धुक्या न्हापांगु बैठके नेमकिपाया सचिव प्रेम सुवालजुं नेमकिपाया सिद्धान्त व विचारं प्यापिन्ता जक थुगु समाजया दुजः याय्मगु, प्रकाशनता निरन्तरता बिय्मःगु खाँ कडु दिल । सरकारे वांगु पार्टी टुंकागुलिं हे देश घाटाय् वांगु नपां देशया फुक्क थाय् नाजुक जूगु खाँ कडु दिल । समाजया नायो लासिवजुं ग्वाहालीयापुं सकसितां शुभाय् देछायो दिल ।

अथे हे २ वडा समितिया ग्वसालय मृगौला रोगसम्बन्धी स्वास्थ्य शिविर जुल । उगू ज्या भ्वःसं खप नपाया उपप्रमुख रजनी जोशी, भूपु वडाध्यक्ष रविन्द्र खर्बुजा वडाध्यक्ष (२) हरिप्रसाद बासुकला, विनोदचरण राय, वडा सदस्यपुं तुल्सीलक्ष्मी दुमरु, श्यामसुन्दर मातां व राजन जति जुं नं थःगु नुगः खाँ प्वंक द्यूगू खः ।

सहिद दिवसया लुमन्ति अन्तरनगर करँते धिं धिं बला कासा क्वचाल



२०७५ फागुन ५ गते

ख्वप नगरपालिकां सहिद दिवसया लुमन्ति ग्वसाग्वु अन्तरनगर करँते धिं धिं बला कासा हानेबहम्हा नेमकिपाया नायो वरिष्ठ राजनीतिज्ञ नारायणमान विजुकछेंजुं आइतबार पानसय् मता च्याक उलेज्या याडु दिल ।

उगु ज्या इवसं बिजुकछेंजुं देशया स्वतन्त्रता व सार्वभौमिकता रक्षा याय्ता कासां तहांगु ग्वाहाली याडुगु जुगुलिं न्हूगु पुस्ताता कासाख्य् ह्यो अनुशासित व मितव्ययी ढंग म्हेतेता बः बियगु खः । कासा ख्यलय् नं अपालं भ्रष्टाचार व अनियमितता जुयो च्वंगुया विरुद्धय संघर्ष याय्मःगु खाँ कडु दिल । कासा त्या बु स्वयो स्वस्थ प्रतिष्पर्धा काथं हज्याय्मःगु नपां कासामि पिनिगु लागिं कासामितय्गु वृत्ति विकासया नितिं राज्यं व्यवस्था याय्मःगु खाँ कडु दिल ।

उगु ज्या इवसं नेमकिपाया प्रदेश सभा सांसद सुरेन्द्रराज गोसाईं, उपप्रमुख रजनी जोशी, प्र.जि.अ. नारायणप्रसाद भट्ट, भनपा १ या वडाध्यक्ष नपां युवा तथा खेलकुद समितिया संयोजक श्यामकृष्ण खत्री, वडाध्यक्ष ७ या उकेश कवां, वडाध्यक्ष ९ या रबिन्द्र ज्याख्व नं. थःगु नुगः खाँ प्वंक द्युगु खः ।

उगु ज्या इवसं पाँचखाल, धुलिखेल, पनौति, (भ्वँत) बनेपा, येँ (महानगरपालिका), यल (म.न.पा.), चन्द्रागिरी, तार्केश्वर, सूर्यविनायक, चाँगुनारायण, मध्यपुर, धनकुटा, वीरगञ्ज (उ.म.न.पा.), तुल्सीपुर, विरेन्द्रनगर, सुर्खेत, सुर्खेत (इलाम), गोकर्णेश्वर(काठमाडौं), बाह्रविसे नपा (सिन्धुपाल्चोक), महालक्ष्मी (काठमाडौं), बेलौरी (कञ्चनपुर), गोदावरी (कैलाली),

नागार्जुन(काठमाडौं), ख्वप(भक्तपुर नपां २३ गू नपापिसं ब्वति कःगु खः । उगु उद्घाटन ज्याइव न्ह्यो न्याली याडु सुरु यागु खः ।

२०७५ फागुन ७ गते

स्वन्हुयंक जूगु अन्तरनगर करँते धिं धिं बल्ला कासा फागुन ७ गते छगू समारोह याडु क्वचाल । सहिद स्मृति खेल मैदाने जूगु उगु सभाय् ख्वप नपाया प्रमुख सुनिल प्रजापतिजुं २०४६ सालय् सहादत्त प्राप्त यापू वीर सहिद पिनिगु लुमन्ति व सम्मानस ख्वप नपां यागु थी

थी धिं धिं बलां ख्वप याय्पिन्ता जक भिंजुइगु मखुसिं देशादेछिता हे ग्वाहाली जुइगु खाँ कडु दिल । शासन सत्ताय वां पिसं सहिद पिनिगु बलिदान लोमांके धुंकगु वयक पिनिगु नामं फाइदा जक काय्गु ज्यासाडु च्वंगु खाँ काडु दिल ।

ख्वप नपाया उद्देश्य समाजयाता न्हूकाथं हिलेगु, पूँजीवादी ब्यवस्थाय् दैःगु कमि कमजोरी जनता तय्ता काडु सचेत व सडुगठित यायां अनुशासित, सभ्य व सुसंस्कृत समाज दयकेगुलि बः बियगु खः । ख्वप नपां शिक्षायाता बः बियोगुया कारण शिक्षित व अनुशासित मनूतय्सं जक देशे न्हूगु परिवर्तन ह्यफैगुलिं खः।

उगु ज्याइवसं निवर्तनमा प्र.प्र.अ. रोहितराज पोखरेलजुं नं. न्वचु तयो द्युगु खः ।

अथे हे नेपाल करँते महासंघका नयो दावा गुरुड, वडाध्यक्ष (१) या श्यामकृष्ण खत्री, वडाध्यक्ष ७ या उकेश कवां, वडा नं. २ या हरिप्रसाद बासकुलाजुं न्वचु बियो द्युगु खः ।

थी थी तौलया कासामि पिनिगु धिं धिं बला जूगुलि ५ गु स्वर्ण व २ गु रजत पदक त्याक नागार्जुन नपा पुच “न्हाप”, ५ गू स्वर्ण त्याक तारकेश्वर नपा पुच “ल्यू”, २ गु स्वर्ण नपां चन्द्रागिरी नपा “ल्यूया ल्यू” लागु खः । थुगु धिं धिं बला कासाय् मिजं कासमिख्य् ख्वप नपाया मदनकुमार थापा व मिसा कासामिख्य् नागार्जुन नपाया सन्ध्या महतो तस्कं बांलापुं कासामि नपां बेलौरी नपां अनुशासति पुचः या उपाधि त्याकगु खः । उगु पुचः व कासामिपिन्ता ख्वप नपाया प्रमुख सुनिल प्रजापतिजुं पदक लः ल्हाडु द्युगु खः ।

सहिदया म्हागस काथं ज्या याय् फःसाजक सहिदया सम्मान जुइ

२०७५ फागुन ८ गते बुधबार

नेपाल क्रान्तिकारी किसान संघया गवसालय २०४६ साले सहादत्त प्राप्त यापुं सहिदपिन्ता सम्मान याय्गु ज्याइवले नेमकिपाया केन्द्रीय सचिव सांसद प्रेम सुवालजुं सहिदया म्हागस काथं ज्या याय् फःसाजक सहिदया सम्मान जुइगु खाँ कडु दिल । तस्कं सम्मानित व्यक्तित्व सहित दय्गु म्हागसया अखः सरकारं ज्यासाडु च्वंगुलि कुखिडु दिसे अमिगु बांमलागु ज्याखं देश बदनाम जूगु खाँ कडु दिल । राजनैतिक कार्यकर्ता तय्गु मुख्य भूमिका जनता तय्ता समाजवादी विचारं प्रेरित याडु पूँजीवादया विरुद्धे ल्वाडु समाजवाद स्थापना याय्मःगु

खाँ कडु दिल ।

उगु ज्याइवसं ख्वप नपाया प्रमुख सुनिल प्रजापतिजुं सहिद पिनिगु बलिदानं वगु प्रजातन्त्र व पूँजीवादी गणतन्त्र वगु खः । सहिद तय्गु म्हागस पुवांकेता थमनं थःगु लागां देश व समाजया नितिं इमान्दारीपूर्वक ज्या सानेगु बचं बियो दिल ।

उगु ज्याइवसं नेपाल क्रान्तिकारी किसान संघया नायो डिल्ली प्रसाद काफ्ले, उपप्रमुख रजनी जोशी, नेमकिपा भूप. नगरअध्यक्ष रविन्द्र खर्बुजा, महिला संघया रोशनमैया सुवाल, नेक्राकिसंघया गोविन्द दुवाल, २०४६ सालया घाइते सत्यसम्मोहन राजोपाध्याय पिसं नं. थःगु नुगः खाँ प्वंकगु खः ।

ख्वप अस्पतालया भवन निस्वान

२०७५ फागुन ९ गते विहीबार

ख्वप वडा नं. ९ च्याम्हासिंह लिक्क च्वंगु ख्वप अस्पतालया भवन नेमकिपाया केन्द्रीय नयो हानेवहम्हा वरिष्ठ राजनीतिज्ञ नारायणमान विजुकुठेंजु पाखें निस्वाडु दिल ।

उगु ज्याइवसं अध्यक्ष विजुकुठेंजु भ्रष्टाचार याडु जूसां



धेबा कमेयाय्गु मति दः पिसं देश व समाजया विकास याय् मफैगु खाँ कडु दिसे सेवा भावं ज्या याय् सल्लाह बियो दिल । भक्तपुर अस्पतालया दुर्गतिया जिम्मेवार सरकार हे खः धायोदिल । सरकारं बांलागु अस्पताल दय्के मफतकिं जनतातय्ता दुःख जुइ । वयकलं निजी अस्पतालता बः विइगु सरकारं ज्यासाडु नैपुं ज्यापु ज्यामि तय्ता सुविस्ता विइमखु धायोदिल । भक्तपुर अस्पताले बांलागु व्यवस्था याय् मफगुलिं अप मनूतयगु अकालं ज्यान वांगु खाँ उल द्युसें उपचारया अभावं सुनं मनू सिय थम्ब धायगु मतिं

ख्वप अस्पताल दय्के तांगु खाँ कडु दिल । सकसिनं इमान्दारीपूर्वक ज्या सांसा ख्वप नमूना दे जुइगु नपां देशां देछिया सेवायाय् फैगु खाँ ब्याक्क वयकलं ख्वप अस्पताल नमूना अस्पतालया काथं विकास याय् मःगु खाँ या सल्लाह नं. बियोदिल ।

नेमकिपाया केन्द्रीय सचिव एवम् सांसद प्रेम सुवालजुं केन्द्रीकृत मानसिकतां संघीय सरकार न्हयाक च्वंगु ज्या मिले मजु धायो दिसें देशे निजी अस्पताल बढे जुयो च्वंबले ख्वप अस्पताल निस्वांगु तस्कं बांलागु खाँ खः धायोदिसें थुकि अपलं अपः जनताया सेवा याइगु विश्वास याडु दिल । निजीकरणता बः बियो च्वम्हा अःयाय्म्हा सरकार जनताया सरकार काथं हज्याय मफगुलि कुखिडु दिल ।

नेमकिपाया केन्द्रीय सदस्य नपां ख्वप नपाया प्रमुख सुनिल प्रजापतिजुं ख्वप अस्पताल दय्केता विदेशी सहयोग छतिं हे मकसिं भूगु हे १४ करोडया बजेटं दय्कागु खाँ कडु दिल । अथेहे ख्वपया जनस्वास्थ्य केन्द्रे सुविधा सहितया इमर्जेन्सी, मिखाया अस्पताल, आयुर्वेदिक उपचार केन्द्रं दांक व बांलाक उपचार याडु वयो च्वंगु खाँ कडु दिल ।

उगु ज्याइवसं प्रदेश सभाया सांसद सृजना सैजु, उपप्रमुख रजनी जोशी, निवर्तमान प्रमुख प्रशासकीय अधिकृत रोहितराज पोखरेल, ज्योतिष विरेन्द्र प्रसाद कायस्थ र नेपाली सेनाका उपरथी भरत खड्काजु पिसं नं. न्वचु बियो द्युगु खः ।